

Gabinete Mike Eman a rescata dos joya y duna nan un balor adicional

Renobacion di Watertoren San Nicolas ta cla

EL a tuma su tempo, placa y trabou, pero sin duda algun tur esfuerzo tabata bale la pena. E proceso di restauracion di Watertoren San Nicolas ta culminando. E rescate di ambos Watertoren ta den cuadro di e Plan BoBario cu ta busca pa restaura monumentonan, renoba edificionan gubernamental y embeyece areanan publico en general.

Despues cu WEB Aruba N.V. a traspasa propiedad di e edificionan pa Stichting Monumentenfonds, e estudio, planificacion y ehecucion di e proyecto a gana bou direccion, guia y supervision di Monumenten Bureau Aruba y un envolvimento y inclusion den e Master Plan di Plan BoBario caminda ambos edificio lo haya un funcion nobo na beneficio di comunidad.

SAN NICOLAS

Oficina di Monumento for di prome instante a propone pa Watertoren San Nicolas bira un Museo Industrial. Mas despues Gobierno a anuncia cu e proyecto lo conta cu un marketplace rond di dje. Full e proyecto ta cay bou di e vision di Gabinete Mike Eman pa renobacion di San Nicolas. Na augustus 2011 e project dossier di renobacion di Watertoren San Nicolas a keda cla. E tardansa cu e trabounan na e watertoren pariba a conoce tabata dor cu a constata cu e edificio aki tabatin mester di refuerzo den su estructura mayor na esun di Oranjestad. Tambe a haci test di beton cu a indica cu e integridad di e material tabata uno deficiente y mester atende e aspecto

aki tambe, loke a hiba na un rediseño di e plan inicial di renobacion.

ORANJESTAD

Como parti di e trabou di restauracion di Watertoren Oranjestad a traha un pida moderno cu ta pas cu e construccion original. Canando den edificio por nota e parti nobo y e parti cu a wordo restaura den su forma original cu su trapi original.

For di december 2011, Director di LAR mr. Ilona Henriquez hunto cu su personal a muda p'e edificio cu tin cuater piso prome cu e tanki di awa cu a keda intacto mescos cu e trapi monumental.

E trapi no ta den uzo mas pa resguarda su balor historico y pesey a traha un trapi adicional ademas di un lift. E edificio, den su estado actual ta conta cu cuater oficina, un sala di reunion mey mey, un sala di espera cu ta den e parti nobo, ademas di un biblioteca, archivo y espacio caminda ta tene audiencia dos bes pa siman, tratando un promedio di 10 caso pa siman.

Restauracion di Watertoren Oranjestad ta un di e proyectonan cu ta cay bou Plan BoAruba cu ta inclui renobacion urbano den e sentido mas amplio di palabra. Centronan di ciudad ta haya un facelift completo y e barionan tur atencion necesario.

Watertoren restaura den tur su gloria ta un trabou excelente di arquitecto Kamsteeg y tur envolvi. E vision di Gabinete Mike Eman ta loke a percura cu awe e cambionan ta tumando lugar den tur skina di Aruba.

